

SAN PABLO KARTA E'SU FXI'JNI TESALONIKA ÇXHABTEWE'SX JÏI

*Tesalónika çxhabte Dxus yakh
fxi'zesawe'stxxi Pablöwe'sx fxi'jni*

¹ Pablo yaasesa naa karta's fxi'jaçthu Silwano vxite' Timoteo txãawe'sx yakh, yakthê'jwe'sx Tesalónika çxhabte pkhaakhena üssawe'stxxi weçxana. I'kwe'sxa' Dxus kwe'sx Tata vxite' kwe'stxxi jxpe'jsa Jesukristo txãawe'sx yakh tx-utemée wala ew fxi'zena üsi'kwe.

² I'kwe'stxxi' Dxusa' pu'çxhina vxite' kwe'stxxi jxpe'jsa Jesukristo, txãa pa'ga Dxus yakhçxáa mfxi'zewe.

*Kristo' sxawedna kîhçxa Dxusna
nwêese'jsameewe'stxxi kastigaîna*

³ Yakthê'jwe'sx, i'kwe'sx pa'gate pejka Dxusa's weçxawa'j ji'ph yuhtha'w, txã'wê yūuni' kxulsame' naa pa'ga. Txãa pa'gatey i'kwe'sx üsuh Dxusa's yaakxnisa' een isa jwee iîçxáa walaana u'jweça', naapkaçxha' teeçxsa na'wêçxah puutx ya'peeygâhna fxi'zewa'jwa jwee iîçxáa pehnana u'jweça'.

⁴ Txãa pa'gatha'w kwe'sxa' msuuwa Dxus luuçx pkhaakhena üsnisu wêt weçxana pta'sxi' i'kwe'sx ew fxi'zeni's. Txã'wê yuukahnîi i'kwe'sxa' txakwe wala pkxuuni yahçena

ũsçxawa, Dxus yakh jxpubamée fxi'zewa'j yu'sa' wa'lmeei'kwe ãate kaavxya'ja'ja'.

⁵ Dxusa' iiméh wala ewsa' na' txãasa ne' txã'wě ew fxi'zewa'ja's i'kwe'sxtxi kaavxya'ja'ja', txãa pa'ga i'kwe'sxa' pkuuuni yahçena ũsçxawa txajx jxkaahna ũsnite pa'jwa'jsai'kwe.

⁶ Nawa i'kwe'sxtxi pkuuusáa yuutxi' ka'tuwa Dxus kastigãyni yuh yuutxna,

⁷ sa' i'kwe'sx nxuste fxi'zesa yuutxi' jxkaasewa'ja's ũsuna kwe'sx yã'jçxa, txã'wě Jesukristo' txajx angeleswe'sx yã'jçxa cielujũ kîhçxa,

⁸ Dxusna nwěese'jmeeçxa kwe'sxtxi jxpe'jsa Jesukristo's pta'sxni'swa nwěese'jsameetx kastigãyya' seena' ipx wala yakh kîhçxa txã'wě kwe'sxtxi jxkaasewa'ja's ũsuna.

⁹ Txãawe'sxtxi' Dxus jxkaahna ũsni tasxu txuhdeçxa bagaçxte yuhwa peena yu' Dxus yakh puutx uywa'jmeete nxuste kastigãyni yuutxna.

¹⁰ Naapkaçxha' na'wě kwe'sx pta'sxni's i'kwe'sx jxukaysa jxpa'gai'kwe txãa yã'jçxa vxite' Dxus luuçx jxukaysa yakh wala weçxana Jesukristo's jxpa'gasa yuune'kwe txajx sxawedna kîi ente'.

¹¹ Txãa sũhçxatha'w i'kwe'sx pa'gate Dxus yakh puutx we'wena nes yu', Dxusa' i'kwe'sxtxi pa'yayã'jçxa' txajx kusete jxpe'jna nes yuukahn. Sa' txã'wěy Dxus yakh puutx we'we'tha'w, Dxusa' i'kwe'sxtxi peeygãawa'ja's pu'vxitumée kxtey yuuçxa txãa yakh jxpubamée fxi'zewa'ja'swa jxuka pu'çxkahn,

¹² kxah kwe'sxtxi jxpe'jsa Jesukristo's tuuthe'jsa yuune'kwe, naapkaçxha' i'kwe'sxa' Je-

sukristo tuuthe'jni yuune'kwe naasáa kwe'sx
Dxus vxite' Jesukristo peeygãapa'ga yuuçxáa.

2

*Teeçx piçthē'j iiméh seena' kazx pkalsa
vxyaana*

¹ Nawa āçxha' kwe'sxtxi jxpe'jsa Jesukristo
kwe'sxtxi pkhakhya' kīiwa'ja's pta'sxiçthu,
yakhthē'jwe'sxtxi wala neewe'wena.

² I'kwe'sxa' thēymée yu'pthehna ūsnuwe, isa
yuhwáana sūhna ūukhna, txā'wē Jesukristo
kīiwa'j ena' ājxā'kh jīni's, meeçxawa Dxusku
vxyaaçxa txā'jīkaja' jīwáatxna, meeçxa'
Pablok txā'wē pta'sxkaja' jīwáatxna, nmehte'
kartawa kwe'sx fxi'jni na'wēysaçxawa ĩsxiinisa
pa'jawáana.

³ Nawa weh yuhwa jxpubanuwe ĩsxiini's.
Txā'wē jxpubakahmén Kristo kīiwa'j en
āhmeyna nyafxte' Dxusa's uy wēemée
ahçeçxa txāa yakh puiiwa'j en khuē'y u'puna,
naapkaçxha' teeçx piçthē'j eçxthē'j na'wēy
iiméh seena' kazx pkalsa infxiernote akhni
yuuwa'jsawa vxyaana.

⁴ Txā' kīhnawa jxuka açesa yuuna Dxus
yase's kxsuusni yu'sa', sa' dxuus yatte u'kaçxa
kaçxhiina, adxa' Dxusthu jīna jxkaajxa'.

⁵ Adxa' kxtee i'kwe'sx yakh nee ūsiy
pta'sxthu txā'wē Dxusa's açesa pa'jwa'ja's, aça'
çyaaki'çmeekwe'?

⁶ Txā'wē yūuwa'j en āhmeyna, txāa ewmeesa
kasehwe'sxte kīh txā'wē yupna ūstewa txā'sa' jii
i'kwe i'kwe'sxa'.

7 Txãa ewmeesa' paaçte mjïina yã'j ũsa', aça' naasáa txãa ewmeesa's yupna neewesa's kutxi'jwa'jçxáa yã'j peejxa'.

8 Txajũ isa txãa ewmeesa' äate vxyaana, nawa Jesukristo' txajx we'wenijuçxáa naa dudte ikhena, sa' peena yu' kaavxya'ja'jmeena eena' kweethna kïini yakh.

9 Txãa kazx ewmeesa' eçxthê'j kaahni txã'wê pa'jana, txãasa kim yuhwa äjanimeesa's kaavxya'ja'jana ïsxiina kaypuba'jna.

10 Sa' Dxus yuwe isasa's pta'sxni's jxpa'gasameetxi' thëymée kaypuba'jana ewmeesaçxá's kaavxya'ja'jçxa.

11-12 Txã'wê Dxus yuwe isasa's pta'sxtewa jxpa'gamée ïsxiina pta'sxnixá's nwëese'pha'ga, Dxusa' txãawe'sxtxi' jxpubakahn nvxiituna vxi-tuwa'jsa yuukahn.

Ewte neeyũwa'jsatx Dxus txhitxhnisa

13 Nawa kwe'sxa' багаçxtewa Dxusa's weçxawa'j ji'ptha'w i'kwe'sx ew fxi'zepa'ga. I'kwe'sxa' Jesukristo peeygãanisai'kwe, txãa pa'gatey Dxusa' nyafxiitey txhitxhku i'kwe'sx ewte neeyũwa'jsatx, aça' Dxus Espiritu' pkal ji'phmeesak vxitna pa'j yuwe ewsa's jxpa'gapa'ga.

14 Txã'wê yuuya'k Dxusa' pa'ya yuwe ewsa kwe'sx pta'sxpa'ga, kxah kwe'sxtxi' jxpe'jsa Jesukristo ũsnite pa'jya' äjakahn.

15 Txãa pa'ga, yakthê'jwe'sx, weh yuhwa jxpubamée meswe, na'wê i'kwe'sx yakh ũçxa kaapiya'tha'w sa' kartatewa fxi'jna pta'sxtha'w txãatx peçxkanamée.

16 Kwe'sxtxi jxpe'jsa Jesukristo vxite' Dxus kwe'sx Tata peeygãhçxa bagaçxte yuhwa pçuwa'jmée weçxana ũswa'ja's ũsku

17 txãa i'kwe'sx ũustxi kçxhãaçxha'jana, açã' kîhwa ewçxãa yũuna fxi'zene'kwe, we'wewa'j ma'k yuu nawa ewsaçxã's puutx we'wena.

3

Dxus yakh mpuutxwe'wewe kwe'sxtxi neewe'wena

1 Nmehte', yakthê'jwe'sxtxi na'wêth neewe'we': I'kwe'sxwa ma'wêkwe Jesukristo pta'sxni's weçxana jxpa'ga txã'wëy msuuwe'sxwa jxpa'gakahn Dxus yakh mpuutxwe'wewe kwe'sx pa'gate,

2 kxah nasa ewmeesa kuseju iyu'nja'w. Txã'wëme' jxukaysa yu' Dxusa's yaakxsameeta'.

3 Txã'wëtewa Jesukristo' bagaçxte yuhwa i'kwe'sxtxi' nvxihtmée ewmeejũ nwe'wena kçxhãaçxha'jana.

4 Kwe'sx pta'sxni's na'wë yũuna ũsi'kwe txã'wëçxãa nes yuukahn Jesukristo' pu'çxhina sũju'tha'w.

5 Sa' Dxus peeygãani's peçxkanamée yaakxkahn, Jesukristo' kaayaki'jna nes yuuna txãa na'wëy çxhãaçxha fxi'zekahn.

Mjüwa'j ji'pha'

6 Yakthê'jwe'sxtxi Jesukristo jxkaahni's neewe'weçtha'w: maa yakthê'jwa mjüimeena sa' kwe'sx kaapiya'jni'swa kxtey yuumeena açã' txã'wësa yakha' pkhaakhenuwe.

7 I'kwe'sxa' jii i'kwe kwe'sxa' ma'wě yūuna fxi'zesatewa. Kwe'sxa' i'kwe'sx yakh ũsçxa', mjïimée yu' fxi'zemeetha'w.

8 Sa' ũ'a's dukhmée yu' fxi'zemeetha'w, wejxwa en ma'k yuu kus ma'k yuu nawa wala çxhâçxha mjïitha'w i'kwe'sx maa yuhtxwa thâasya'mée.

9 Txã'wě yūu wēemeewaça', kwe'sxa' i'kwe'sxtxi pu'çx thâasya' âjawa'jsatha'w yu'. Nawa txã'wě pu'çx thâasmée mjïitha'w, i'kwe'sxwa kwe'sx na'wěy yūuna fxi'zekahn.

10 Txã'wě yūukahmeníi kwe'sxa' kxtee ũsçxa' na'wě yūuwa'ja'stha'w nvxiht: Mjïiya' wa'lsa', ũ'wa'jme' jīna.

11 I'kwe'sx yakh ũssa maái yu' kīh yuhwa mjïimée ewmeeçxáa fxi'zena yuwe ksuusu'jna fxi'zewa'ja'sçxáatx yaaki' jīnatx pta'sxi'.

12 Jesukristo jxkaahni'stha'w juuna' we'wena jxkaaja' txã'wě yūusatxi', kxah txãawe'sxa' çxhâçxha mjïiçxa peekx ũ'wa'ja's uyuutxna.

13 Yakhthě'jwe'sx, i'kwe'sxa' ew yūuwa'j yu'sa' wa'lnuwe.

14 Meeçxa' maái yu' kxtey yuumeewáatxna na'jīna fxi'jaçtha'w txã'sna aça' maa txã'wě yūusatewa ew jiyuçxa, txāa yakh pkhaakhenuwe, kxah thaameetxna.

15 Nawa puisáa na'wě yu' yuunuwe, wejxwa zhiçxkwe myu'kxpehwe, ma'wěçxawa yakhthě'ja' naa pa'ga.

Dxus yakhçxáa fxi'zewa'ja's neewe'weni

16 Kwe'sxtxi jxpe'jsa Jesukristo' i'kwe'sx wět fxi'zewa'ja's ũsuna bagaçxtewa, ewçxáa kaafxī'ze'jna. Dxus yakhçxáa mfxi'zewe.

¹⁷ Pabloth txã'wě weçxana fxi'ja' adx kuseju. Adx kartatxi' txã'wěçxaçxáath adx yase's ki'pna fxi'ja', txãasath na'snawa txã'wěy fxi'ja'.

¹⁸ Kwe'sxtxi jxpe'jsa Jesukristo' pu'çxhina i'kwe'sx jxukaysatx.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

06da09f4-8d0f-5001-ae8c-0e6aa0131ffd